

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma chuan nimin khan Mizoram leh Manipur inrinaa Tuivai Lei a hawng a, a hmingah inunauna lei, ‘Unity Bridge’ a vuah.
- 2. Home Minister Pu K. Sapdanga chuan nimin khan a Department, UD&PA hnuaiia hna thawh te hmun 8-ah a endik.
- 3. Union Cooperation Minister Amit Shah chuan mi tinte chu an theihna ang zela hna pek chu ram hmasawwna nena thlunzawm a, chhungkaw tinte hna siamsak chu thawhhona tha tak tak hmanga tih theih chauh a nih thu a sawi.
- 4. Prime Minister Narendra Modi chuan vawiin chawhma dar 11 hian 'Mann Ki Baat' programme a hmang leh dawn.



TUIVAI BRIDGE

Chief Minister Pu Lalduhoma chuan nimin khan Mizoram leh Manipur inrinaa Tuivai Lei a hawng a, a hmingah inunauna lei, ‘Unity Bridge’ a vuah.

He hunah hian thu sawiin Chief Minister chuan he kawngpui hi Mizoram leh Manipur inkalpawhna kawng pawimawh ber a ni thin a ti a, Inter State Bus te pawh tlantir a ni a, lei hi tuilianin a lak leh mai thin avangin kum 1999 khan meter 6 laiin an tisang a. Hma an lak mek lai hian Seling to Tipaimukh road chu National Highway atana puan a ni a. MoRTH lamin permanent-a dawh tumin hma an la mek tih hre chungin, sum leh pai seng lutuk lo va, Bailey Bridge part hlui te fawm khawm a, hun engemaw chen atana hman theih tur Bailey Bridge dawh an rilruk ta a ni a ti. Hna an thawh tan lai nikum May ni 9 khan amah ngeiin a hmun hi a tlawh thu leh hmanraw thar hmanga dawh zawk turin PWD Engineer te a hrilh thu a sawi a. Chief Minister chuan he lei dawh hna hi hmanhmawhthlak bik leh pawimawh bika an ngaih avangin chak takin an bawhzui a, kum khat pawh a ral hmain an dawh zo va, tun thla ni 2 khan uluk takin an enchhin a, tha tawkah an ngai tih a sawi.

Chief Minister chuan Kawngpui tha pahnih a awm dawn ta chu thaw a veng huai tih a sawi a. He lei chhawr phak mipuite a lawmpui thu leh Manipura unau harsatna tuar mekte puala theihtawp chhuaha an dawh a nih avangin Inunauna Lei (Unity Bridge) tiin a hming a vuah thu a sawi a ni.

He lei sei zawng hi meter 200 a ni a, a lawn kaina lei meter 50 a nei a, a vaia meter 250 a sei, metric ton 30 dawl zo tura dawh a ni. Tlo leh him taka a awm theih nan metric ton 20 chin chauh zawhtir an phal dawn thung a ni.



UD&PA MINISTER

Home Minister Pu K. Sapdanga chuan nimin khan a Department, UD&PA hnuai hna thawh te hmun 8-ah a endik.

UD &PA hnuai hmasawna ruhrel hrang hrang thawh mek te hi a viltu engineer, official te leh mi pawimawh dang te nena thawk chhuakin uluk takin a sak hna kalpui dan te an thlir ho a. Heng hnathawh mek te hi a tha tlang viau a, tha taka chhunzawm tura chahin hnathawktute chungah lawmthu a sawi.

Hna thenkhat, tan lak ngai deuh thawktu contractor te pawh rin tlak leh tang zawka hna chhunzawm turin a chah baw a ni.

Nimina project hrang hrang a tlawh te hi: - Zodin Multi Level Parking cum Utility Centre; Tuikuala Reconstruction of Sanitation Site Office; MINECO a Aizawl Convention Centre (phase I & II); Tuikual North a Multi Utility cum Community Centre; Chawnpuia Extension of Sports Centre leh Multipurpose Hall, Chawnpui; Zonuama Multipurpose Community Hall leh Chaltanga Multipurpose Parking cum Vegetable/Meat Market te an ni.

Heng hna te zingah hian kum 2018 atanga thawh tan tawh Zodin Multi Level Parking cum Utility Centre chu mipuiin an nghahhlelh tawh thu a sawi bakah contractor te pawh tang lehzuah thawk turin a hrilh.

He projectah hian Smart Transformer installation leh Robotic Parking chu testing and commissioning hmabak a ni a. Hei hi a rang thei anga thawk turin Department lam official te leh contractor te chu a hriattir baw a ni.

<><><>

DDK MOU

Mizoram Larsap Gen (Rtd.) VK Singh chuan Kolasib District chhunga National Highway thawmthat hna kal muang chuan mipuite harsatna nasa takin a thlen a ni, a ti.

Nimina Kolasib DC Conference Hall-ah Sawrkar Department hotute, khawtlang leh tlawmngai pawl hruaitute a kawmnaah he thu hi sawiin Larsap chuan NHIDCL hnuai Four Lane kawng laih turah compensation leh forest clearance chungchangahte harsatna tamtak sutkian a ni tawh a ti a. Hna thawh theih hun chhung a tlem avangin NHIDCL hotute chu a rang thei ang bera chak taka hma la turin a hrilh a. Harsatna a awm a nih pawhin amah hrilhhre zel tur leh puih a inhuam reng thu a hrilh a ni.

Larsap chuan Kolasib District chu Mizoram luhka leh chak lakna pawimawh tak a nih avangin Larsap a nih hnua tlawh hmasak bera a neih thu a sawi a. Dan leh thupek kenkawh kawngah thawktu indaih lo chungah enforcement agency te'n theihtawp an chhuah thin chu lawmawm a tih thu a sawi a. Thalaite nun tibuaia ram tana hmelma lian tak ni mek ruihhlo do kawngah tanlak lehzuah a tul a, ruihhlo tawlhruk eng emawzat man ni mah se, man loha kal tlang pawh a awm nual avangin hemi kawngah hian a huhova tanrual a tul a ni, a ti.

Larsap hian nimin vek khan Vairengte-a Counter-Insurgency and Jungle Warfare School (CIJWS) a tlawh a.

He hunah hian CIJWS Caommandant Maj Gen VK Nambiar chuan CIJWS kalphung leh sipai hnen a zirtirna an pek dan tlangpuite a sawifiah a, sipaite'n indo nunchan an entir baw.

Governor hian CIJWS Campus Lailapur pawh a tlawh baw a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

SERCHHIP

Mizoram Synod Modeartor Rev RC. Lalnghakliana'n nimin khan Serchhip Sailiam Presbyterian Kohhran Biak In thar a hawng.

Biak In thar hlanna Inkhawm Serchhip Sailiam Kohhran Biak Ina hman chhonzawmna Programme chu Chhimchhak Presbytery Moderator leh Serchhip Vengchung Bialtu Pastor Rev Lalremruata'n kaihhruaiin, Biak In Thar hlanna hun a hmang a, Mizoram Synod Moderator Rev RC. Lalnghakliana hnen atanga Pathian thuchah ngaihthlak a ni.

Serchhip Sailiam Presbyterian Kohhran Biak In hi tum 3 sak that tawh niin, tuna mi hi kum 2023 Aug ni 15-ah Biak In lungphum a ni a, a dung feet 62 leh avang feet 24 a lian a sak niin, a sakna sum hi Synod atangin nuai 30 an hmuh leh Kohhran tualchhung sum te senral niin, bial chhung Kohhran hrang hrang atangin sum leh tha leh bungrua hlutak tak engemawzat pek (donate) a ni bawk a, tun dinhmunah Sailiam Kohhranah hian member 45 an awm mek a ni.

<><><>

PM MANN KI BAAT

Prime Minister Narendra Modi chuan vawiin chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 119-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>

Amit Shah

Union Cooperation Minister Amit Shah chuan mi tinte chu an theihna ang zela hna pek chu ram hmasawmna nena thlunzawm a, chhungkaw tinte hna siamsak chu thawhhona tha tak tak hmanga tih theih chauh a nih thu a sawi.

Kum thum kalta chhung khan Centre hmalakna avang in cooperative sector hian nasa takin hma a sawn a, sorkarin cooperative movement hi a bik takin a tichak a ni. Nimin chawhnu khan Pune-a Janata Sahakari Bank-in diamond jubilee lawmna a hmannaah thu a sawi a, Modi sorkar chuan India rama cooperative sector chu a tungding a ni, a ti.

Central Register Cooperative Society-a regional office hmasa ber chu Pune-ah hawn a nih tur thu a sawi bawk. Amit Shah chuan chutiang bawkin ram puma cooperative bank-te sum lama harsatna atanga chhuah tir turin a khawihtu tur organization din a nih thu a sawi bawk. Amit Shah chuan cooperative-te'n thiamna thar zawkte an pawm chu hmasawmna chhonzawm zel tur chuan a pawimawh hle a ni, a ti.

Pune-a Western Zonal Council meeting vawi 27-na chu Union Home Minister chuan a kaihruai bawk a. Cooperative bank-te chu technology hmang tangkai turin a ngen. Cooperative education tihchhak nan cooperative university bill a puang bawk.

<><><>